

also per se eingenommen / als ein abstergens damit zu laxiren. Welcher aber solchen noch weisser vnd schöner / in Gestalt grosser Crystallen haben will / der thue ihm also.

Es ist zu wissen / daß alle Salia, wann sie in grosse Crystallen schießen sollen / daß auch derselben ein grosse Quantität zugleich seyn müssen / dann von wenig kompt wenig. Will man dann schöne grosse weisse Crystallos tartari machen / welche zwar nicht besser / als die vorige seyn / doch aber den Augen angenehmer / so muß man auff diese Weise zu Werck gehen.

Nimb weissen pulverisirten Weinstein / vngesehr 20. 30. mehr oder weniger Pfundt / vnd giesse darüber so viel Wassers / als zum solviren desselben von nöthen ist / vnd koche mit starckem Feuer denselben in einem verzinneten Kessel so lang / biß aller Weinstein im Wasser zergangen ist / welches man mit einem hölzern Löffel erfahren kan / vnd schäume auch die Unreinigkeit / welche sich oben auff das Wasser begiebet / fleißig davon / vnd muß auch wol in acht genommen werden / daß des Wassers nicht zu viel oder zu wenig dazu genommen werde / dann wann desselben zu wenig genommen wird / so bleibet ein Theil des Weinstens im Kessel vnauflöset liegen / welcher mit dem Schlamm hinweg geworfen vnd verlohren wird / vnd so desselben zu viel genommen wird / so ist der Tartarus zu weit im Wasser zertheilet / vnd kan nicht wol anschießen / vnd gehet auch verlohren / in deme er hernach mit dem Wasser